



# ज्वजलपा वाःवो

JWOJALAPA NEPALBHASA WEEKLY

दै: ६ ल्या: १७ पूर्णाङ्क: ६९

ने. सं. ११३६ कछलाख चौथी आइतवा:

२०७२ कार्तिक २९ गते आइतवार (Nov- 15, 2015)

मू: ५/- (न्यातका)

## वर्तमान मुलुकया अवस्थाय् किपूमितय्गु सरोकार 'अघोषित नाकाबन्दी'—अभाव व भीगु भूमिका



ज्वजलपा वा:पौ/

व्यवस्थापिका संसदया निगूगु तःधंगु राजनीतिक दल एमालेया अध्यक्ष केपी शर्मा ओली प्रधानमन्त्री जुइ न्हयः तःक लागतार रुपं भारतं 'नाकाबन्दी' यात धकाः थीथी संघ सस्थानिसें राजनीतिक पार्टीया भातु संगठनतपाखें तःक सतकय् भारतया विरोधय् प्रदर्शन याःगु खः । अबले भारतया प्रधानमन्त्री नरेन्द्र मोदीया पुत्ला तःक सतकय् च्याकेगु ज्या जूगु खःसा अले एमालेया अध्यक्ष केपी शर्मा ओली प्रधानमन्त्री जुइ धुसानिसें सतकय् नाकाबन्दी विरुद्धया प्रदर्शन खने मदया वन ।

थौकन्हय् स्वल धाःसा 'नाकाबन्दी'या विरुद्ध धकाः छुं न कथंया प्रदर्शन जुयाच्वंगु मदु । छगू कथं धायेगु खःसा न्हापासिवें भन भन देशय् पेट्रोलियम पदार्थनिसें जाथुइगु ग्यासया अभाव जूगुलिं जनजीवन कष्टकर जुयावंगु दु तर सतकय् धाःसा न त भारतया 'नाकाबन्दी'या विरुद्धय् यैय् प्रदर्शन जूगु खने दु न त सरकारयात खबरदारी यायेगु ज्या जुयाच्वंगु दु ।

पेट्रोलियम पदार्थ व ग्यासया अभावया कारणं पसलय् वना च्या तःक त्वने मखनीगु अले वासः पसलय् वासःया अभाव जुया वनाच्वंगु दु । वासः मदया म्ह मफुपिन्त भन भन समस्या जुया वंगु दु । बजारय् खाद्यान्नया भाः भन भन थिके जुया वनाच्वंगु दु ।

अले पेट्रोलियम पदार्थ 'ब्लाय्क' मियाच्वंगु दु । मोटरसाईकल गइपिन्सं पेट्रोल स्वसःनिसें न्यासः तःक पुला न्याना च्वंगु अवस्था धइगु सकलसिन्सं सिउगु तर औपचारिक रुपं धाये मछिगु खँ जुयाच्वंगु दु । थुगु कथं जनजीवन भन भन कष्टकर जुया वनाच्वंगु थ्व इलय् सचेत नागरिकत न्ह्याः वना मुलुकया समस्या समाधान यायेमाल धकाः सम्बन्धित निकाययात धायेमाःगु ई वःगु दु ।

राजनीतिक पार्टीत थःथःगु पें लिना वनाच्वंगु अवस्थाय् राजनीतिक दलतय्सं खँ ल्हवना समस्या समाधान यायेगु कुतः याइ धकाः आशा याये फयाच्वंगु मदु । समस्यायात कया थःथःगु छँय् त्वालयनिसें हरेक थासय् खँ जुयाच्वंगु दु । तर उकियात कया छगू सहलह ब्याका छुं न छुं पहल याना वनेमाःगु वाः चायेका किपूया ज्यापुतय्गु संस्था ज्यापु महागुथि किपू नगर समितिं अन्तर्क्रिया ज्याभ्वः यायेत्यंगु दु ।

ज्यापु महागुथि किपू नगर समितिया शनिवाः च्वंगु मुँज्यां जन सरोकारया विषययात कया अन्तर्क्रिया ज्याभ्वः यायेगु धकाः निर्णय याःगु खः ।

वइगु मंगलवाः मंगल उच्च मा.वि.या प्राङगनय् ज्यापु महागुथिपाखें याइगु अन्तर्क्रिया ज्याभ्वःया विषय हे 'नाकाबन्दी'—अभाव व भीगु भूमिका धकाः बियातःगु दु । किपूया नागरिक समाजनिसें थीथी ख्यलय् महत्वपूर्णगु भूमिका म्हिता वयाच्वं पिं नाप नापं सर्वसाधारणयात ब्वनातःगु दु । ज्यापु महागुथि किपू नगर समितिं उगु कथंया अन्तर्क्रिया ज्याभ्वलय् सहभागी जुइत सकल किपू नगरवासीपिन्त इनाप याःगु दु ।

सार्वजनिक बिदा दुगु छठ पर्वया मंगलवाः सुथय् १० वजेनिसें सुरु जुइगु उगु ज्याभ्वलय् थौया राजनीतिक अवस्थाय् नाकाबन्दी यात धकाः धयाच्वंगु वास्तवय् छु खः ? मुलुकया समस्या अले जनजीवनय् लानाच्वंगु लिचःयात कया आःया अवस्थाय् नागरिकतय्सं छु गजःगु भूमिका म्हितेमाः धइगु विषयया कया केन्द्रीत जुया सहलह जुइ धाःगु दु ।

थज्वःगु अवस्थाय् सचेत नागरिकत सुक च्वनाच्वन धाःसा छु जुइगु खः अले आःया अवस्थाय् थुगु कथं नागरिकतय्सं सरोकार क्यनेमाः धइगु खँय् केन्द्रीत जुया सहलह ब्याकेगु ज्या जुइ धाःगु दु ।

### देशय् भन भन हे समस्या

### अभावया अभाव

### —म्ह मफुपिनिगु नितिं

### वासःया अभाव

### —जा थुइगु ग्यासया अभाव

### —मचिकंया अभाव

### —पेट्रोलियम पदार्थया अभाव

### —यातायात साधन म्हो

### जक संचालन जुया समस्या

### —खाद्यान्न भन भन थिके जुयावन

## सकल किपूमिपिन्त ब्वना — पौ

हनेबहःम्ह.....

.....

मूखँ: 'नाकाबन्दी'—अभाव व भीगु भूमिका विषयसं जुइगु सहलह मुँज्याय् ब्वति कायेगु खँय्

थौं मुलुकय् 'अघोषित नाकाबन्दी'या कारणं देशय् न्हिया न्हिथं समस्या जुया वनाच्वंगु दु । जा थुइगु ग्यासनिसें पेट्रोलियम पदार्थ मदया जनजीवनय् ब्वलनाच्वंगु समस्यायात कया ज्यापु महागुथि किपू नगर समितिया ग्वसालय् आःया अवस्थाय् सचेत नागरिकतय्गु भूमिका छु जुइमाः धइगु खँय् जुइगु सहलह मुँज्याय् सहभागी जुइत इनाप यानाच्वना ।

थाय्: मंगल उच्च मा वि, किपू ।

ई सुथसिया १० ता इलय् ।

ज्यापु महागुथि  
किपू नगर समिति

तिथि: ने.सं. ११३६ कछलाख षष्ठी मंगलवाः (मंसिर १ गते)



## ज्वजलपा वा:पौ

सल्लाहकार  
श्रीकृष्ण महर्जन  
प्रकाशक:

नजरराम महर्जन  
सम्पादक

श्रीकृष्ण तण्डुकार  
ले-आउट:

ज्वजलपा डेस्कटप  
संवाददाता

भरत महर्जन, निरजमान सिंह  
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४१४०१०७७

ई-मेल : jwojalapaweekly@gmail.com

### सम्पादकिय

## राजनीतिक रुपं सचेत नागरिक समाजया भूमिका दयेमा: ?

पेट्रोलियम पदार्थ अभाव जूगु अले ग्याँसया नं अभाव जूगुलिं जनजीवन भन भन कष्टकर जुया वनाच्चंगु दु । सरकारया जिम्मेवार मन्त्रालयसं हे भारतया अधोषित नाकाबन्दीया कारणं हे समस्या जुयाच्चंगु खः धकाः धायेगु याना वयाच्चंगु दुसां औपचारिक रुपं ओली सरकारं भारतपाखें नाकाबन्दी हे याःगु खः धकाः अझ नं धाये फुगु मदुनि ।

सीमा नाकाय् अवरोधया सवालयात कया भारतीय अधिकारीतयसं नेपाःया तराईवासीया समस्याया कारणं अवरोध जुयाच्चंगु खःधासैं नेपाःया समस्या समाधान जुल धाःसा यातायात सुचारु जुइ धकाः न्हयथसैं थःपिन्सं नाकाबन्दी यानागु मदु धयाच्चंगु दु । अले उखे आन्दोलन याना वयाच्चंगु संयुक्त लोकतान्त्रिक मधेसी मोर्चा धाःसा थःपिन्सं पंगः थानाच्चनागु खः धयाच्चंगु दु । थःथःगु कथंया तर्क व दावी जुयाच्चंगु थ्व इलय् अन्ततः अभावया कारणं जनजीवनय् भन भन कष्टकर जुयावंगु खँय् धाःसा सुयां निगू मत मदु । थ्व इलय् राजनीतिक पार्टीया नेता व कार्यकर्तात ला विभाजित जुयाच्चंगु दु तर राजनीतिक रुपं सचेतपिं नागरिक समाजया न्हयलुवात नं सुक हे च्वनाच्चंगु दु ।

वास्तवय् जनताया जन जीवनय् वःगु समस्यात कया सरकार नापं सरोकारवालायात खबरदार आः नं मयात धाःसा थ्व समस्या भन भन तःधं जुया वनेफुगु अवस्था दु । उकिं आः राजनीतिक रुपं सचेत नागरिक समाजया न्हयलुवातयसं सम्बन्धित निकाययात कया खबरदारी यायेगु ई वःगु दु ।

### मुक्तक ज्ञानीराजया

नुगःया घाः, घाः याना वंम्हस्यां छु सी  
मतिना छु धैगु, मति मदुम्हस्यां छु सी  
खुसि बाः वया चुइका यन मतिना या छें  
गथे याना निस्वनागु चुइका यँम्हस्यां छु सी ।

तापाक्क खः छ, तर जित ल्वःमंके मते  
जिगु ख्वाः ल्वःमंसां मतिना ल्वःमंके मते  
म्हाइपुगु ई भीगु ल्वःमंका छ्वया विउ  
न्ह्याइपुगु ई त गुब्बें हे ल्वःमंकेमते ।



## वि.सं. नेपालयागु सम्बत कि भारतं आयातित ?

### —विराजकाजी राजोपाध्याय

विक्रम सम्बतया न्हूगु दँया लसताय् गुलिखे नेपाःमित दुबिनाच्चंगु दु । विक्रम सम्बतया न्हूगु दँ हनेत गुलिखे मनूत पिकनिक न्यायेकाच्चंगु दु सा गुलिखे मनूतय् छैय् हे पासापिं मुनाः नयेत्वेने यानाः, तास म्हिताः न्हूदँया लसता प्वकाच्चन । गुलिसिया तापाक वा सतिक सां चाःह्यूवनाच्चंगु दु । थुकथं गुलिसिया विक्रम सम्बत न्हूदँया लसता हनाच्चंगु इलय् गुलिसिनं धाःसा विक्रम सम्बत धइगु भारत वर्षया सम्बत जूगुलिं भी नेपाःमितयसं भारतीय सम्बतया न्हूदँ छाय् हनेमाःगु धयाच्चंगु दु । थ्व हे खँय् सामाजिक संजालय् स्वर धाःसा विक्रम सम्बतया न्हूगु दँया भिंतुना आपाःसिया अंगः जायाच्चंगु दु । तर गुलिसिनं ला थःथःगु अंगलय् जितः कपिपिंगु सम्बतया न्हूदँया भिंतुना सुनां नं बीमते धकाः सुचं हे तयातःगु खंकेफइ । विक्रम सम्बतया न्हूदँयात कयाः थौकन्हय् थुलि चर्चा परिचर्चा जुयाच्चंगु इलय् विक्रम सम्बत लिसं थुगु सम्बतया न्हूगु दँ हनेगु प्रचलनया इतिहासयात छकः कुलेगु सान्दर्भिक हे जुइ । न्हापा न्हापा स्वत धाःसा विक्रम सम्बतया न्हूगु दँयात थुकथं उत्सवया रुपं हनेगु चलन खनेमदु ।

थुकियात उत्सवया रुपं हनेगु चलन वःगु ताई नं मदुनि । नेपाःगालय् स्वयेगु खःसा नेपाल सम्बतया न्हूगु दँयात जक उत्सवया रुपं हनेगु चलन दुगु खः । म्हपुजा कुन्हु सकलें वसन्तपुलिइ मुनाः भिंतुना दु भिंतुना, न्हूगु दँया भिंतुना धकाः च्याली वनाः उत्सव न्यायेकीगु खः । वसन्तपुरया च्याली नापनापं न्हापा सांस्कृतिक रुपं सुकुन्दा च्याली, सीइताः मत च्याली, मन्दः चव्या आदि आदि यानाः न्यायेकीगु थुगु चलनय् थौकन्हय् आधुनिकतां नं थाय् कयायं कूगु लुइके फइ । थौकन्हय् म्हपुजाया दिक्कुन्हु वसन्तपुर या च्यालीइ वनेवलय् नं फेश पेन्टिंग यायेगु मोटर साइकल च्याली, कन्सर्ट, पाश्चात्य हुलाप्याखं आदि आदि यानाः नं थौकन्हय् नेपाल सम्बतया न्हूगु दँ हनेगु यानाहल । थुकियात भीगु संस्कृतिइ वयाच्चंगु ह्यूपाः कथं सांस्कृतिक रुपान्तरण कथं कायेगु खः कि विकृति कथं कायेगु व थःथःगु विचाः जुइफु । तर थुगु खं थन धायेत्यनागु थ्व हे खः कि थिथी कथंया ह्यूपाःलिसैं नेपाल सम्बतया न्हूदँ हनेगु चलन थन पुलांगु खः । व हे लिसेलिसैं इस्वीया न्हूगु दँयात नं तःधंगु हे उत्सवया रुपय् हनेगु यानाच्चंगु दु । खतुं थ्व चलन नं यक्व

पुलांगु मखु । थनयापिं ल्याय्महतयत् पश्चिमि सभ्यतां सालायंकूबलय् थौकन्हय् इस्वीया न्हूगु दँयात नं ल्याय्महतयत् तःधंगु हे उत्सवया रुपय् हनेगु यानाहःगु दु । क्रिसमसया दिक्कुन्हु व डिसेम्बरया लिपांगु न्हिकुन्हु थँवहिलिइ पलाः तयेत तक्कं थाय् लुइके फइमखु । उगु इलय् थँवहिलिइ तःधंगु हे ल्याखय् ल्याय्महत चर्च्छि हे इस्वीया न्हूगु दँ हनेगुलिइ ब्यस्त जुइ । थनथाय् थ्व खं नं लुमके वःजु कि उगु सम्बत गगु देशं व थासं नेपालय् दुहांवल, उगु थाय्यापिं पर्यटकत नं थँवहिलिइ थ्यनाच्चनी । इमिसं नं थःगु सम्बतया न्हू दँया लसता क्यनी, प्वकी । तर गगु पहलं नेपाःमित ल्याय्महतयत्सं न्हूगु दँ हनी, व कथंया पहः धाःसा इमिगु जुइमखु । इमिसं सभ्य तरीकां मेपिन्त मछिं मजुइगु कथं हे उत्सव हनी । थुकथंया हे चलनया अनुकरण यानाः विक्रम सम्बतया न्हूगु दँयात उत्सवया रुपं हनेगु यानाहःगु खः ।

छुं दँ न्ह्यः जक स्वर धाःसा नं विक्रम सम्बतया न्हूदँया दिं कुन्हु उत्सव हनेगु ला छु न्हूगु दँया भिंतुना देछायेगु तक्क नं सुयां मनय् मलू । उगु दिक्कुन्हु न्हूगु दँ खःला धैथें हे जुइफु । तर आः धाःसा नेपाल सम्बत व इस्वी सम्बतया उत्सव हनेगु याःथेंहे विक्रम सम्बतया न्हूगु दँयात तजिक हनेगु चलन दयावल । थ्व हे सन्दर्भय् विक्रम सम्बतया इतिहासयात नं छकः दुवाले । विक्रम सम्बत, जुजु विक्रमादित्यया नामं वयाच्चंगु सम्बत खः । विक्रमादित्य नं भारतवर्षया मालवी धइगु राज्यया जुजु खः धकाः इतिहासं धयाच्चंगु दु । भारतवर्षयाह जुजु न्ह्याकूगु थुगु सम्बत नं भारतवर्षयागु हे खःगु धया वयाच्चंगु दु ।

खतुं विक्रम सम्बतयात आः नं भार तय् छयलाच्चंगु मदुगु मखु । तर विक्रम सम्बतया पञ्चधरतयसं थुगु सम्बतया शुरूवात नेपाः भूमिं हे जूगु नं धायेगु याः । थथे धाईपिनगु विचाः कथं विक्रम सम्बत न्ह्याःगु इलय् नेपाल व भारत निगुलिं देय् मदु । विक्रमादित्य नं भारतीय मखसैं नेपाः गाःयाम्ह हे खःगु व लिच्वनी जुजु भूमिवर्मा हे विक्रमादित्य खःगु नं मधाःगु मखु । थुगु खँयात प्रमाणित यायेत सक्कया वज्रजोगिनीइ दुगु विक्रमादित्यया धयातःगु छयंया मूर्तिव विक्रमादित्य नालाया उत्तरापुरय् राज्य न्ह्याकूगु किम्बदन्तियात प्रमाणया रुपय् न्हयब्ययेगु नं याः ।

उलि जक मखु, छम्ह ऋषिया वीर्य नयाः गर्भ च्चम्ह मिसापाखें विक्रमादित्यया जन्म जूगु व विक्रमादित्यं येंय् राज्य याःगु किम्बदन्ति नं द । थुज्गु खँय् वनेवलय्

विक्रमादित्य धइम्ह भारतीय मखु, नेपाःमित हे खः धइथें तायावः । तर थुगु खँयात प्रमाणित यायेत लोक वाखं थुज्गु किम्बदन्ति वाहेक ऐतिहासिक प्रमाण धाःसा छुं हे मदु ।

थन गतेया ल्याखं न्ह्याकीगु विस्काः जात्रा, घ्यःचाकु सल्लू आदिया आधारय् नं नेवाःतयसं न्हापांनिसैं विक्रम सम्बत हनेगु याः धकाः नं धायेगु याः । दँया ल्याखं स्वर धाःसां नेपाल सम्बत न्ह्याःगु इलय् विक्रम सम्बत १२२६ न्ह्यानाच्चंगु ई जुल । व ल्याखं नेपाल सम्बत स्वयां न्हापा हे विक्रम सम्बत न्ह्यायेयुंमखु खः धायेगु याइ । इतिहासया पौ पुइका स्वयेबलय् लिच्छवीकालय् शक संवत वा शाके संवत न्ह्यानाच्चंगु खनेदु । मानदेवं थःगु हे नामं मानदेव संवत न्ह्याकूगु व अंशुवर्मा थःगु नामं अंशुवर्मा संवत नं न्ह्याकूगु खनेदु । लिपा वयाः राघवदेवया पालय् नेपाल सम्बत न्ह्यात ।

खपया जेला त्वालय् लुयावःगु अभिलेखय् उल्लेख यानातःगु संख्याः सम्बत नं नेपाल सम्बत हे खःगु अनुसन्धातातयसं धायेयुंमखु दु । लिपा पृथ्वीनारायण शाह नं नेपाःगाः त्याका कायेधुंकाः हाकनं शक सम्बतयात हे निरन्तरता ब्यूगु खनेदु । नेपालय् विक्रम सम्बतया छयलाबुला गबले जूगु खनेदु ले सा इतिहासया कालखण्डय् ? नेपालय् विक्रम सम्बतया छयलायात स्वयेगु खःसा १९६१ सालय् वयाः तिति खनेदइ । विक्रम सम्बत १९६१ बैसाख १ गतेया दिननिसैं नेपालया सरकारी ज्याखँय् विक्रम सम्बतयात मान्यता ब्यूगु खः । उगु इलय् चन्द्रशमसेरं प्रशासनिक ज्याखँ यायेत अःपुकेगु नितीं धकाः विक्रम सम्बतयात छयलेगु याकूगु खः । गतेया ल्याखं हनाच्चंगु धाःगु भीगु नखःचखः वा जात्रापवंया खँ ल्हायेगु खःसां व विक्रम सम्बतया ल्याखं हंगु धाये पायिछ जुइमखु ।

नेपाल सम्बत धइगु चन्द्रमासया ल्याखं न्ह्यानाच्चंगु सम्बत जुल । भीगु आपाः धइथें नखःचखःत चन्द्रमासया ल्याखं हनाच्चनागु दु । घ्यःचाकु सल्लू खाइसल्लू, विस्काः जात्रा आदि धइगु विक्रम सम्बतया ल्याखं मखु, सौरमासया ल्याखं हनीगु खः । सौरमासया ल्याखं न्ह्यानाच्चंगु सम्बत विक्रम सम्बत जक ला पक्का नं मखु । थनथाय् भीसं बिचाः यायेमाःगु खँ थ्व हे खः कि भीसं भीगु थःगु हे सम्पत्तियात गौरव तायेकेगु खःकि पिनं वःगु वस्तुयात थःगु धकाः प्रमाणित यायेत स्वयाच्चनेगु खः । नयेगु, ल्वनेगु, पुनेगु, स्वयेगु आदि सकतां पिनं वःगु बांलाः तायेकाच्चनापिं भी, ययेकाच्चनापिं भी । आः तजिलजि तक्कं आयातितयात थःगु तायेकाच्चनेगु खः ला कि, भीगु हे सम्पत्ति, भीगु भीप्रति लयतायेगु ?

**Admission Open at**

**BBS 1<sup>ST</sup> YEAR**  
(Four Year Course)

**JANADHAR COMMUNITY CAMPUS**

**Panga 12, Kirtipur, Kathmandu, Nepal**

**Tel. No. 4330880, 4331982, Email: janadharcampus@gmail.com**



# जनस्तरं तःजिक इन न्हूदंया भिंतुना

नेपाल संवत् भिंछसः व स्वीखुदं १९३६ कयंगु ससताय जनस्तरं तःजिक भिंतुना इनेगु ज्या याःगु दु । भिंतुना इनेगु ज्या यें, यल, ख्वप, किपू, थिमि, पांगा, येंया पश्चिम लागा, तोखा, सुनागू, जल, थेच्व नापं वस्ती वस्तीइ जनस्तरं याःगु खः । सांस्कृतिक बाजं थाना न्हूदंया लसताय भिंतुना इनेगु नापं सांस्कृतिक जुलुस तकं पिकाःगु खः । नेपाःया राष्ट्रिय संवत् नेपाल संवतया न्हूदंयात तःजिक हनेगु नितिं थनि स्वीन्यादं न्हयवनिसें लगातार रुपं जनस्तरं आन्दोलनया रुपय् न्हयाका वयाच्वंगु खः । लिपांगु इलय् वया भिंतुना जुलुसयात सांस्कृतिक जुलुसया रुपय् हिला वंगु दु । अथे हे न्हूदंया लसतय् स्वनिगलं पिने नं नेवाःतयगु वस्ती वस्ती नं थःथःगु कथंया ज्याभ्वः याःगु दु । अथे हे देशं पिने वनाच्वपिं नेवाःतय्सं नं थःथःगु थासय् म्हपुजा यायेगुनिसें थीथी कथंया ज्याभ्वः याना न्हूदं हनेगु याःगु दु ।

## येंय् न्हूदं तःजिक हन, प्रधानमन्त्री ओली मूपाहां



ने.सं. १९३६ न्हूदंया लसताय येंय् नेपाल संवत् न्हूदं राष्ट्रिय समारोह समिति १९३६ या ग्वसालय् तःजिगु ज्याभ्वः जुल ।

स्वनिगःया थीथी थासं ब्वति काःगु उगु न्हूदं सभाय् दलंढः मनुत सहभागी जूगु खःसा येंया थीथी खलः पुचःत यें देय् चाःहिलाः सांस्कृतिक जुलुस यानाः वसन्तपुरया उगु सभाय् ब्वति काःगु खः । वसन्तपुरय् जूगु उगु ज्याभवलय् प्रधानमन्त्री केपी शर्मा ओली मूपाहां कथं भायादीगु खः । समारोह समितिया नायः डा. महेशमान श्रेष्ठया सभापतित्वय् न्ह्याःगु उगु ज्याभवलय् थीथी राजनीतिकनिसं हनेबहःपिं व्यक्तिवपिन्सं दबुली आशन ग्रहण यानादीगु खः ।

समारोह समितिया नायः डा. महेशमान श्रेष्ठ नेपाल संवत् व नेपालभाषायात सरकारं मान्यता बीमाःगु नापं व्यवहारय् छयलेत सरकारयात ध्यानाकर्षण यानादीगु खःसा वयकलं आः सर कारं नेपाल संवत् व इस्वी संवत् देसय् छयलाः बिक्रम संवत् चीकेमाःगु खं न्हयथना दिल । नायः डा. श्रेष्ठ भारतं यानातःगु अधोपित नाकाबन्दीयात कयाः वयकलं सरकारं आः भारतयात नाकाबन्दी यायेगु लेंपु बिइमज्यूगु खं न्हयथनादिल ।

अथेहे, मूपाहां प्रधानमन्त्री केपी शर्मा ओली नेपाल संवत् नेपाःया मौलिक संवत् खः धकाः न्हयथसं धयादी, 'छम्ह जनता शंखधर साखाः नं देसया जनताया ऋण पुलाः ऋणमोचन यानाः देसया नामं नीस्वना तःगु संवत् भी

सकल नेपाःमिया मौलिक संवत् खः । उगु इलय् शंखधर छम्ह र ण्ट्रवादी व देस सुधारक खः । वयकःया देन थ्व नेपाल संवत् खः ।' नेपाल संवत् छयलेगु नितिं थः सकारात्मक जूगु खं कनादिसं मूपाहां प्रम ओली धयादी, 'नेपाल संवत्यात छयलेगु नितिं जि स्वयं व नेपाल सरकारया ग्वाहालि दु ।' प्रम केपी शर्मा ओली न्हूदं समारोह समितियात सरकारपाखें माक्वः आर्थिक ग्वाहालि यायेगु बचं विसं सकल नेपाःमिपिन्त न्हूदंया भिंतुना देछायादीगु खःसा प्रधानमन्त्रीया नामं प्रम ज्याकूपाखें भिंतुना पौ नं छवयाः हःगु खः । ज्याभवलय् इमेज च्यानलपाखें इमेज सिरपाः नं लःल्हाःगु खः । थुगुसीया इमेज सिरपाः नेपालभाषा ख्यःया न्हयलुवाः प्रा. माणिकलाल श्रेष्ठयात लःल्हाःगु खः ।

## पांगाय् न्हूदं तःजिक हन

दैंयदसंथें पांगाय् नं थुगुसी न्हूदं तःजिक हन । पांगाय् ज्वजलपा मिसा पुचः सालिक त्वालं न्हूदं च्याली पिदंगु खः । पांगाय् फुकक धइथें त्वाःया मिसा पुचःतसें ब्वति काःगु उगु च्याली बाजं खलःतयगु नं सहभागी दुगु खः । आयोजक त्वाः सालिकय् मुनाः ब्वति कयादीपिन्त सिन्ह तिकाः ख्यें सगं वियाः न्ह्याकूगु उगु च्याली पांगाय् फुकक त्वालय् चाहिला सालिकय् वयाः सभाय् हिउगु खः । थुगुसीया तःभुखाचं पांगाय् यक्व हे छें स्यंकाः ब्यूगु खः । त्वाः त्वाःहे सखाप यानाब्यूगु दु ।

उकिं थुगुसी न्हूदंया भिंतुना च्याली हे जुइला मजुइला धेगु शंका जुयाच्वंसां ग्वसाखलः ज्वजलपा मिसा पुचःया तःधंगु कुतलं भिंतुना च्याली जु हे जुल । न्हाक्व हे दुःख कष्ट जूसां नेपाःमित थःगु परम्परा न्ह्याकेत लिचिली मखु धइगु दसि कथं सकसिनं ब्वति कयादिल । न्हापास्वया नं अप्वःसें ब्वतिकाःगु खनेदत ।

न्हापास्वया थुगुसी मिजंतयगु सहभागीता नं यक्व हे खने दु । न्यादं न्हयःनिसं शंखधर साखाःया भवाता मिसातसें कुबिया देय् चाहुइकीगु थुगुसी मिजपिन्सं कुब्यूगु खनेदत । न्हापा त्वाःत्वालय् ध्वाखा दयेका सियूचां



बैंथिला घःतयाःतइगु । थुगुसी ग्वसाखलः त्वालय् बाहेक मेथाय् गनं हे बैंथिला घः तयातःगु खनेमन्त । अथे हे मन्दः नं च्वयातःगु खनेमदु । ध्वाखाया ग्वसाखलः त्वालय् बाहेक मेथाय् गनं हे मदु ।

थ्व फुकक थुगुसीया तःभुखाचं प्रभाव लाकूगु खः । भुखाचं छेंय् दुनाः मनुत उखेंथुखें तहराय् च्वंवेनेमाला च्वन । सियुचा तकं कायथाय् मदु । ध्वाँय्या भलर तयेत स्वच्याकेगु छेंय् हे मदु । थुगुसी भुखाचं छथि नोक्सान यातसा मेखे सिमानाय् नाकाबन्दी यानाः मनुतय् दैनिक जीवनय्

प्रभाव लाका च्वंगु इलय् जूसा थःगु परम्परागत पर्व स्वन्ति व न्हूदंया ज्याभवः मद्यु । ज्यूज्यूकथं फुककथं हना हे त्वःतल । थ्व छगू नेवाः समाजया विशेषता खः धाःसां छुं पाइमखु ।

च्याली धुंकाः पाःब्वः लःल्हायेगु सभा मेनुका महर्जनया सभापतित्वय् मूपाहां पुलांम्ह राज्यमन्त्री दिलिप महर्जन जुयादीगु खः । अर्जुन महर्जन लसकुस न्वचू तयादीगु उगु ज्याभवलय् आर्थिक प्रतिवेदन श्रीकृष्ण महर्जन न्हयव्यादीगु खःसा प्रा.डा श्यामकृष्ण महर्जन सुभाय् न्वचु वियादीगु खः ।

## किपुलिइ भिंतुना च्याली

नेपाःया राष्ट्रिय संवत् नापं राष्ट्रियताया भावना पिब्वःगु नेपाल संवत् १९३६ न्हूदंया लसताय दैंय् दसं थें थुगुसी नं किपुलिइ सांस्कृतिक बाजं थाना भिंतुना जुलुस पिकायेगु ज्या याःगु दु । किपुलिइ त्वाः त्वालय् च्वंगु दाफा खलःपाखें हे भिंतुना च्याली पिकायेगु ज्या याना वयाच्वंगु खः ।

थ्व हे भवलय् किपुलिइ थुगुसी साःगाः त्वालं पाः काःगु खः । मेगु दैंया नितिं कुतिसाः त्वालं पाः काःगु दु । थुगुसीया भिंतुना च्यालीइ त्वाः त्वालय् च्वंगु सांस्कृतिक बाजं थाना नेवाः वसः पुन यक्व हे मनुत सहभागी जूगु खः । किपूया सागाः त्वालं सुरु जूगु उगु भिंतुना च्याली समल,



घःध्वाखा, दोपाच्व, लाय्कू, बाघभैरव, इताछें, तःननि, तुंभ्वः, म्वानत्वाः, बाकुननी, देयपुखू, चाफः, बाहिगां, नयाँ बजार, नगां जुया हाकनं साःगाः लागाय् थ्यंकाः क्वचायेकूगु खः । नेपाःया राष्ट्रिय सम्बत जूगुलिं

नेपाल संवतया प्रवर्तक शंखधर साखाःया मूर्ति तकं कुबिया चाःहिउगु खः । अथे नेपाल संवत् राष्ट्रिय संवत् खः अले राज्यं हे छयलेमाः धइगु माग याना नेपाःया राष्ट्रिय ध्वाँय् तकं ज्वना भिंतुना जुलुसय् सहभागी



जूगु खः । येंय् नेपाल सम्बतया न्हूदं आन्दोलन सुरु जुइवं हे किपुलिइ नं भिंतुना च्याली पिकाःगु खः । न्हापा आन्दोलनया रुपय् विकास जूगु उगु भिंतुना च्याली लिपांगु इलय् वया सांस्कृतिक जुलुसया रुपय् परिणत जूगु दु ।

## इताग्वः व भाजंगलय् नं च्याली

इतागोल युवा विद्यार्थी क्लबया ग्वसालय् नेपाल संवत् १९३६ न्हूदंया लसताय भिंतुना जुलुस पिकाःगु दु । नेपाःया मौलिक संवत् नेपा संवत्या न्हूदंया लसताय सांस्कृतिक बाजं थाना इताग्वः व भाजंगः लागाय् चाःहिउगु खः ।

न्हूदंया भिंतुना धकाः सकलसित भिंतुना इना अथे चाःहिउगु खःसा इताग्वलय् हे थ्यंकाः क्वचायेकूगु खः । दैंय् दसं इताग्वः व भाजंगः लागाय् मंकाः कथं भिंतुना च्याली याना वयाच्वंगु खः । धिमे बाजं नापं थीथी खलः पुचःपाखें ब्यागलं ब्यागलं कथं ब्यानर सहित सहभागी जूगु खः । नेपाःया राष्ट्रिय संवत् नेपाल संवत्यात राज्यं हे व्यवहारय् छयलेमाःगु नापं राष्ट्रियताया भावना पिब्वःगु नेपाल संवतया महत्वयात थुइकेत उगु कथंया भिंतुना जुलुस पिकाःगु खः ।





## -विजयरत्न असंबरे

नेपाल सम्बत ११३३य निर्देशक सनमकुमार श्रेष्ठया “**ख्या: वल ख्या: वल**”, निर्देशक मानिक उराय्या “**अज: मिखा**”, निर्देशक बासु शाहीया “**ब्याहा याये म्हा:**” रुपिन डंगोलया “**मतिनाया स्वां**” नापं याना: मुक्कं प्यंगू जक नेवा: फिल्म पिदनसा ११३४य निर्देशक भोगेन्द्र मानन्धरया “**ध्वला ग्यानापू स्टायाल**” निर्देशक सुरेन्द्र तुलाधर या “**मू मदुगु जिन्दगी**”, व अमृत महर्जनया “**द्वपमि सु**” नापं याना: स्वंगू हे जक फिल्म पिदन । थये निर्देतक स्वंगू प्यंगू जक नेवा: फिल्म पिदना: नेवा: फिल्म ख्य: हे खिउँसे च्वंथे खने दयाच्वंगुलिं आ: वया: नेपाल सम्बत् ११३५ दुने मुक्कं भिगू फिल्म पिदंबलय खिउँज: चिलावंथे तायेकाह:गु दुसा आ: थूगुसी ने.सं. ११३६य अफ् थसिबे अफ्: फिल्म पिदनी थें जा:गु लकस ब्वलनाव:गु दु । नेपाल सम्बत् ११३५ दुने पिदंगु नेवा: फिल्म निर्देशक आर्यम नक:मिया “**तिमिला**” दकले न्हापांगु ख: । नेवा:तय दथुई तना वनेत्यंगु नेवा:



भायप्रतिया मतिना ज्वना: विदेशं व:म्ह नेवा: म्थ्यायमचाया बाखं दुगु थ्व फिल्मयात आपा:सिनं ययेकूगु खनेदत । अथेहे तुं थूगुसी पिदंगु मेमेगु फिल्म निर्देशक सनमकुमार श्रेष्ठया “**लाय् मदु पस: कला मदु सस:**” नं आपा:सिनं तारीफ या:गु फिल्म ख: । भाषाख्य:या छम्ह साहित्यकारया स्या:चा:या बाखं दुगु थ्व फिल्मय मेन रोल म्हितूम्ह महन्तलाल मल्लया ज्यायात नं आपा:सिनं तारीफ हे या:गु खनेदतसा “**तिमिला**” फिल्मय विदेशं व:म्ह मिसामचाया रोल म्हितूम्ह मयजु साक्षी मुल्मी राई न्हुम्ह कलाकार जूसां थ:गु रोलय बांलाक अभिनय या:गु खनेदत ।

थौकन्हय विदेशय दां कमे यायेत वनीगुयात वैदेशिक रोजगार धा:थेंतुं न्हापा न्हापा अथे वनीगुयात तापलय वनेगु धका: धाइ । थये तापलय वनीगु ऐतिहासिक खँयात बाखनय मा: हना: दयेकूगु “**तापलय**” नांयागु फिल्म स्वन्हुतक लगातार च्यारीटी शो क्यना: छगू च्वछायेवहगु पला: न्ह्याकूगु खनेदतसा स्वन्हुया दुने न्याद: स्वकुमितसें स्व:गु थ्व फिल्मं भिगू लख तका दां मुना: छगू न्हूगु रेकर्ड तयेत ता:लागु ख: । उकी मध्ये छगु निर्देशक राज शाक्यया **नख:** नांयागु संकिपा धा:सा छगु च्यारिटी शोजक जूगु खनेदत ।बौद्ध धर्मया प्रचार व सामाजिक

चेतना सञ्चारया ख्यलय तसकं प्रसिद्धम्ह व्यक्तित्व धम्मवति गुरुमांया जीवनी धका बयबय यानात:गु **धम्मवतिया** न्हापांगु क्यनेज्या नं थुगुसी हे जुल । नेपा:या फिल्म ख्यलय तक नांजा:म्ह मेलिना मानन्धरया मेन रोल दुगु थ्व फिल्मया निर्देशक राज शाक्य ख: । **बारासी, सर्ग: मिला, शंकर र, मिजं** थेंज्या:गु आपालं नेवा: फिल्म दयेकेधुंकूम्ह राज शाक्यया धम्मवति फिल्मय धम्मवति गुरुमांया जीवन बाखंसिबें आधुनिक परिवेशया विकृतियात न्ह्यव्येगु कुत: यानात:गु दुसा धम्मवति गुरुमांया आपालं भिचितामिपिन्सं थ्व खँयात कुंखुगु नं खनेदत ।

नेवा: फिल्म ख्यलय ननस्टप फिल्म मेकर धका: धयात:म्ह बासु शाहीया “पागलपन” फिल्म थ्रिलर शैलीया बाखं ज्वनात:गु खनेदत । अथेहेतुं थूगुसी नांजा:म्ह प्याखंम्ह: रवि डंगोल निर्देशन या:गु “टेम्पो चालक” नांयागु छगू फिल्म नं पिदन ।विशेष याना: ख्यालिन्हलाय नांजा:म्ह रवि डंगोलं यामिखू थेंज्या:गु छगू धिसिला:गु फिल्मपाखें थ:गु निर्देशन यात्रा शुरु या:गु ख:सा वयक भाजुं टेम्पो चालकयात नेवा: फिल्म कथं मखसे बहुभाषिक व बहुसांस्कृतिक फिल्मया रुपय पितहयेगु कुत: या:गु दु । थ्व फिल्मया निर्माता व मेन रोल म्हितूम्ह कलाकार गंगा बहादुर नेम्कुलं थ्व सिबें न्हापा “म्हसीका” नांयागु छगू शर्ट फिल्म नं दयेकेधुंकूगु खँ थनथाय लुमंके बहजु ।थूगुसी पिदंगु नेवा: फिल्मय निर्देशक ललेन्द्र शाक्यया न्हापांगु पिदनसा थौया सामाजिक व पारिवारीक स्थिति न्ह्यव्ययात:गु थ्व फिल्मयात आपासिनं ययेकूगु खनेदतसा निर्देशक हरिकृष्ण महर्जनया “स्वंगु छें” नांयागु फिल्म नं सामाजिक पारिवारिक बाखं दुगु

नेवा: फिल्म ख: । न्हापा “**मतिनाया स्वां**” दयेकेधुंकूम्ह निर्देशक व कलाकार रुपिन डंगोलया थूगुसी “**जि य:म्ह पासा**” पिदन । थुकथं थूगुसी गुंगू नेवा: फिल्म पिदंगु धइगु छगू च्वछायेवहगु खँया रुपय कायेमा: । थगुने नगुने स्वंगू प्यंगू जक फिल्म पिदना: छगू शून्य स्थिति खनेदुगुलिं थूगुसी वया: भिगू भिगू फिल्म पिदंगु धइगु बांला:गु हे खँ कथं कायेमा: । तर नेवा: फिल्मया वजा:कथं डिभिडि व भिसिडी अले निगू प्यंगू च्यारीटी शो दुने हे तक्यना: च्वनेमा:गु बाध्यता धा:सा चिइके फुगु खनेमदुनि । थ्वहे भवलय नेपालभाषा लगायत आदिवासी जनजाति मातृभाषाया फिल्म ख्य:या विकास अले हकहितया संरक्षण यायेगु ता:तुना: नीस्वनात:गु थीथी भाय्या संघ संगठनया मंका: संगठन आदिवासी जनजाति चलचित्र महासंघया कुतलय राष्ट्रिय नाचघर य नं नियमित रुपं आदिवासी जनजाति मातृभाषाया फिल्म क्यनेगु पला: न्ह्याकेत्यंगु धइगु छगू लसताया चिं ख:सा थुकिया लव: कायेत नेवा: संकिपाभिपिं नं न्ह्यचिले फयेमा धका: ने.सं. ११३६ न्हूदया भिन्तुना ।



## किपूया गथु प्याखं (गं मखा:गु प्याखं)

सफू बजारय पिदने धुंकूगु दु थ:गु प्रति सुरक्षित यानादिसँ

## सफू दइगु थाय्

- १) खपया च्याम्हसिंहया स्टेशनरी पस: (श्याम सुन्दरया पस:)
- २) खप कमल विनायकया स्टेशनरी पस:
- ३) किपूया सत:क्वया स्टेशनरी पस:
- ४) किपूया देय् पुगूया बाघभैरव स्टेशनरी पस:
- ५) किपूया पांगा दोवाटोया किपू बूक प्वाइट

६) येंया भोताहिनि नातिबज्रया पस:

७) येंया कुलाभुलिइ च्वंगु मंका: धुकू पस:

८) यल, यल ध्वाखा अर्जुन स्टेशनरी पस:

९) कीर्तिपुर सन्देश वा:पौ व ज्वज्वलपा वा:पौया ज्याकू निखासि किपू, फोन नं. फोन नं.: ४३३३००७, ९८४१४०१०७७

९) स्वापू नितिं मेमेगु फोन नम्बर: ४३३४०१३, ९८४१७५२५८३, ९८४६०४६१२३९

मू

सच्छि तका जक (१००/-)

## थ:पिनिगु नेवा: भाय् व खय् भाय् न्ह्यागु भाय्या सुचंनिसें च्वसू व साहित्यया नितिं थाय् मा:सा जिमित लुमंकादिसँ

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

## कीर्तिपुरको चित्रण



ज्वजलपा वा:पतिइ छिगू चिनाखँ/बाखं/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३  
फोन नं.: ४३३३००७, ९८४१४०१०७७

ज्याकू: निखासी त्वा: किपू नपा-३ फोन ल्या: ४३३३००७,  
९८०८६२६४२० ई-मेल : kirtipur\_sandesh@live.com

नेपालभाषाया उपन्यास

कीर्तिलक्ष्मी

वासुपासा

भिं न्हसद्या



पलांच्व लाकां, लंसुरुवाल जनिख चिनाव तपुलिं पुयाव क्वाच्वया दोम्बरलस च्वंना याकलचां गोरखाया खस माहांत नाप ल्वावम्ह भैरवसिंह सुं बहादुर मिजं मखु । वला किपुमित बुयेधुंका बुउगु स्विकार मयावम्ह, सकल किपुया मिसातय रणकौशल स्वँनेगुया नापं हतालया नीतियागु लँ क्यँनाव गोरखाया खसत नाप ल्वायेत हवपाल बिया च्वंम्ह नेपालया छम्हजक वीराङ्गना मिसा महारानी कीर्तिलक्ष्मी जुया च्वँन ।

गोरखाया खस ल्वामिं वयात मिजंम्ह हे तायेकाव ज्वँना यंकल । अले खिउँगु, ख्वाउँसे च्वंगु छेदिस यंकाव कुँनाव तालं म्वाया तल । लिपा भैरव सिंहया चहपह स्वयाव थ्व मनुख पक्कानं मिजं मखु, मिसाहे जुइ माव धयागु ताकं ताकं सियेकल । अले खस माहांनायो खङ्गवीर छन्हु ल्वाभल म्हस भ्यानाव कुनातव थास वँनाव अन पाल च्वँना च्वपिं माहांमि तयत “छिमि नये पित्यात जुइ, बजि नव हूँ धकाव इमित पिने व्छयाव, लुखाया तालं चायेकाव दुहां वँनाव कुँना तवम्हसिया छँलेसं च्वंगु तपुलि त्वकाव स्वत । तपुलि मदुगु छँलं सिइदत व भैरव सिंह धाम्ह मनुख, मिजं मखु छम्ह बांलाम्ह मिसा लाना च्वँन । खङ्गवीरयात व मिसा तवचोकं यव ताल । अले धाल “किपुया हतालस मिजपिं ल्वामित मदयावलसे मिसातहे मिजंतय

भेषस ल्वायेत क्वहां वगु जुया च्वँन धयागु खँ भाजंगालस दिपस सिइपिं च्याका वेलस तिनि सिइदत । छ, छम्ह जक म्वाना च्वंगु दनिगु जुया च्वँन । जिं छन्त न्हास ध्यंके विये मखु तर छ जिम्ह जुया बियेमाव ।

थ्व खँ न्यँनाव कुँना तवम्ह महारानी लिसल बिल किपु देसया सकलें ल्यायम्ह, ल्यासे किपु देया लागि ल्वानाव सिना वँन । वीरपिं किपुमि सुना नं आत्मा समर्पण धयागु मया धालसा जि जक छाय थवगु प्राण ल्यंकेगु ? प्राण ल्यंकेगु यात जिं थवगु इज्जत मतायेका । “थवगु देसया रक्षा याये मफये धुंकाव जि थव जक म्वाना च्वनेगु छुं मनसुवा मदु ।”

कुना तवम्ह ल्यासेम्ह मिसाया थुकथंया लिसल न्यँनाव ययेचावम्ह माहां नायो खङ्गवीरं हाकनं ह्ययेकल । “अथे धाये मते म्वानाच्वँ, जिं छन्त म्वाका तये । छं जित छको साथला विउ ।” थुलि धया कथनं अधीर जुये धुंकुउम्ह माहांनायो खङ्गवीर वयात ज्वँवन । थ्व खँनेवं भैरव सिंहया भेषस कुंकाच्वंम्ह महारानी कीर्तिलक्ष्मी भतिचा लिचिलाव लिफल स्वयाव कथं थवगु म्हस लिउने सुचुका तवगु चुपिं पिकाल “छ जिम्ह जुयाव थवगु बांलागु जीवन हँनेगु अवसरयात सत्कार याये सयकि” धाधां घस पुयेत न्ह्यवने ववम्ह खङ्गवीरयात महारानी कीर्तिलक्ष्मीं चुपि ल्हवंगु खँनाव काचाक्क लिचिल ।

छं जिगु सतित्व प्रति दृढगु थ्व म्हस म्वायेक म्वायेकं थिइ दइ मखु, जित: छं छु थवम्ह याइ ? वरु लुमकि जिगु सिकम्हस जक कु दृष्टि छं तल धालसा तकनं छंगु गति(पति दइमखु । जय किपु ! थुलि धया कथं महारानी कीर्तिलक्ष्मीं थम्ह ज्वँना तयागु चुपि भतिचा क्व छुकल अले थवगु हे नुगलपास प्रहार यानाव किपुया धर्तिस प्राण तोतल ।

थुकथं किपुया स्वाभिमान दुम्ह गुवेलें नं सुयां न्ह्यवने आत्मसमर्पण मयासे छम्ह विराङ्गना मिसा कीर्तिलक्ष्मी नेपालया इतिहासस थवगु नां तया वँन । क्वचाल ।।।।

भिन्तुना

नाति महर्जन

शुद्ध नगया पलेखां जोना  
लसकुस यायवा सकलें मुना  
वल न्हूदें ज्ञज्ञ३६ सुमंग म्ये हाँ हाँ  
शान्ति प्रगति या न्हूम सुर्चो लिसें वोना  
दुःखया सुर्पाय् यचुक चीका  
सुखया निभा भलमल तोयका  
जनताया दुःख कष्ट तंका छेयत  
वल न्हूदें भिगु मुसु मुसु न्हिला  
लसकुस यायवा मनस्वां होयका  
राग द्वेयस पुलांगु लोमंका  
वा भी नेपालि छ्थी छपँ जुइवा  
पुलांगु शत्रुता फुकं तंका  
शत्रु नाप न न्हिला न्हिला जुईवा  
घे घे पुना भिन्तुना देछाय वा  
न्हूदंया भिन्तुना काल बिल याना  
शत्रुतेत नं मित्र याय वा  
न्हूदें तजिक माने याय वा  
नेपाल संवत सकभन छेले वा  
शंखधर साख्वा नुगले तया  
नेपाल संवत राष्ट्रिय संवत भीसं हनेवा  
न्हूदें ११३६ सकसितं सुथौं लायमा  
सकसितं सुभ सुमंगल जुइमा  
सुख सुस्वास्थ्यया कामना याये जिं  
सकल नेपालियात भिन्तुना देछाना  
भिन्तुना भिन्तुना भिन्तुना  
न्हूदें ११३६ या भिन्तुना  
नेपादे व नेपालिया जय जुइगु मनतुना  
सकसित जिं भिन्तुना देछाना चोना

व्यवहारिक जीवन न्ह्याकेत मदयेकं मगाःगु शिक्षा

नासः (न्वचू, उद्घोष व एफ एम संचालन कला)

अप्रत्येक्ष उद्घोषण

उकिं इलय् हे न्ह्याका इलय् हे क्वचायेकेगु ज्या यायेमाः । ज्याभ्वः जुइगु थाय्या लसक अर्थात वातावरण गज्वःगु खः अले थः नं उगु हे कथं प्रस्तूत जुइ फत धाःसां बांलाइ ।

प्राविधिक ज्ञान

माइक अफ व अन यायेगु, स्पीकरया साउण्डया बारे नं उद्घोषकयाके ज्ञान दयेमाः । माइक थःत ज्याछिंक ज्वनेगु असहज कथं मज्वनेगु । अले म्हुतुं माइक थ्यंमथ्यं ४ इन्चनिसें ६ इन्च तक पाक्क ज्वनेगु व नं

माइकया पावर स्वया । अले माइक ज्वगु ल्हाःया चुल्यां म्हय् मथिइकूसा करिव ४५ डिग्रि धेचुइकेगु अले माइक नं उगु हे कथं धेचुइका ज्वनेगु नापं मन्चाया क्वय्पाखे तयेमाः माइक । थःगु ख्वाःयात माइकं मपनीगु कथं ज्वनेमाः ।

वक्तातयगु ज्ञान

ज्याभ्वलय् वईपिं वक्तात सु सु खः ? इमिगु पद, मर्यादाक्रम, संस्था, प्रभाव, न्वंवाइगु शैलीया विषय नं न्हापा हे थुइकेमाः । वक्ता गुलि ताः हाकः न्वंवाइम्ह धइगु खँ नं थुइकेमाः । अले उकियात नं ध्यान बिया उद्घोषण यायेमाः ।

दर्शकया ज्ञान

ज्याभ्वलय् गज्वःपिं दर्शकत वइगु खः धकाः न्हापा हे थुइकेमाः । उद्घोषकं दर्शकत गुलि तक थुइके अःपुपिं अले गुलि स्तर यापिं वइगु खः धकाः सिइकेमाः । दर्शकतयगु मानसिकतानिसें इमिगु स्वभावयात नं न्हापा हे थुइकेगु ज्या यायेमाः ।

शारिरिक हाउभाउ

न्ववाना जक मखु थःगु म्हागःनिसें ल्हाः गुगु कथं सानाच्वंगु दु उगु हे कथं मनूतयसं थुइकाच्वनी धकाः उद्घोषकं थुइकेमाः । उकिं अस्वाभाविक कथं म्हागः तये मजिउ । अले ल्हाः तकं स्वाभाविक कथं संकेमाः । ल्हाः गुगु कथं

सनाच्वन उगु हे कथं मनूतयसं थुइका च्वंगु दइ । थःगु छयं तकं स्वाभाविक रुपं तयेमाः । खँ थुइकेगु नितिं म्हागः अर्थात शरिर व ल्हाः सनाच्वंगुलिं नं यक्व पाइ धकाः उद्घोषकं थुइकेमाः ।

मिखा

उद्घोषकया मिखां नं यक्व खँ कनाच्वंगु दइ धकाः थुइकेमाः । उकिं उद्घोषण यायेगु इलय् मिखाग्वः खने मदइगु कथंया आकूगु चस्मा तये मजिउ । अले स्वयेगु मिखां स्वयेगु रोमन लिपिं डब्लू वा एम आकर जुइक फक्क दर्शकतय्त स्वया न्ववाना च्वंगु थें जुइक उद्घोषण यायेमाः । अथे धकाः मिखा चाचा जक हिइका च्वनेगु मखु स्वाभाविक जुइक स्वयेगु अले फुकक

दर्शकतयसं नं थःत उद्घोषकं स्वया च्वंगु दु धइगु महसूस याकेगु कथंया मिखा जुइमाः ।

वसः

गज्वःगु ज्याभ्वलय् उद्घोषण याये त्यनागु खः धकाः न्हापा हे सिइकाः अन ल्वइगु कथंया वसः पुना वनेमाः । अनया दर्शकतयसं अःपुक स्वीकार याइगु अले आकर्षक जुइगु कथंया वसः पुना वनेमाः । छगू ज्याभ्वःयात ल्वःगु वसः मेगु ज्याभ्वःया नितिं पायेफु अर्थात मत्वयेफु धकाः नं थुइकेमाः । अले अनावश्यक कथंया मेकअपनिसें थःगु म्हागःया थीथी

श्रीकृष्ण महर्जन

अंग खने दइगु कथंया वसः पायछि जुइमखु धकाः बांलाक्क थुइका हे वसः पुना वनेमाः ।

भाषा

उद्घोषकया भाषा तसकं सरल जुइमाः । ज्याभ्वलय् वयाच्वपिं फुकक धाइथें मनूतयसं थुइगु कथंया भाय् जुइमाः । निगू निगू अर्थ वइगु कथं मनूतय्त अलमल जुइगु कथंया भाय् छयले मजिउ । वक्तां न्ववानादीगुयात नं थुइके अःपुइगु कथंया सरल भाय् उद्घोषकं थुइकेमाः ।  
कथंहं.....

नेपाःया राष्ट्रिय संवत् नेपाल संवत् ११३६  
न्हूदंया लसताय् किपू व पांगाय् वंगु  
म्हपुजा खुन्हु पिकाःगु ब्यागलं ब्यागलं  
कथंया तःजिगु भिंतुना सांस्कृतिक न्यालीया  
किपाः । भिंतुना न्यालीइ नेवाः वसः पुना  
नापं सांस्कृतिक बाजं थाना यक्व हे  
स्थानीय नेवाःत सहभागी जुयादीगु खः ।  
मेमेगु किपाः ६ पेजय् स्वयादिसँ...



न्हूदँ किपा: विशेष:



## कीर्तिपुर नगरपालिका कार्यालयको सूचना

तपाईंले कीर्तिपुर नगरपालिकालाई तिर्नु, बुझाउनु पर्ने कर, दस्तुर, शुल्क तोकिएको समय भित्र बुझाउनु हुन अनुरोध छ। तोकिएको समयमा उल्लेखित कर दस्तुर नबुझाएमा नगरपालिकाबाट प्रदान गरिने सेवा सुविधाहरु रोक्का गरिने हुँदा समयमै कर दस्तुर, शुल्क बुझाई सभ्य नागरिकको परिचय दिनुका साथै नगरको विकासमा सहयोग गरी दिनु हुन सबै नगरबासीमा अनुरोध छ। साथै यहाँहरुको घर दैलो, व्यावसाय स्थलमा कार्यालयबाट खटाईएका कर टोलीलाई आवश्यक कागजात सहित कर, राजश्व भुक्तानी गरी सहयोग गरी दिनु हुन समेत अनुरोध छ।

पुनश्च :

नगरपालिकाबाट उपलब्ध गराईने सेवा, सुविधा तथा त्यसका लागि आवश्यक निवेदनको ढाँचा नगरपालिका कार्यालयबाट निशुल्क प्राप्त गर्न सकिनेछ भने वेभ साईटबाट डाउनलोड पनि गर्न सकिनेछ।

फोन नं. ०१-४३३१११०, ०१-४३३१८०५, ०१-४३३१६९३

ईमेल: [ict\\_munkirtipur@gmail.com](mailto:ict_munkirtipur@gmail.com) वेभसाईट : [www.kirtipurmun.gov.np](http://www.kirtipurmun.gov.np)

### बिचा: हायेका

जन्म:  
१९८२ ल्हुति पुन्हि  
सोमवा:



मदुगु: २०७२  
कार्तिक २३ गते  
त्रयोदशी सोमवा:

मदुम्ह पूर्णलाल महर्जन (भेला)

ज्यापु महागुथि किपू नगर समितिया आजीवन ज: रत्नबहादुर महर्जन व ज:पिं गोपालबहादुर महर्जन व हिरालाल महर्जनया अबु पूर्णलाल महर्जन (भेला) ९१ दँय् आकाभाकां मदुगुलिं मदुम्हेसित सुखावती भुनवय् वास लायेमा धका: मनंतुसें दु:खं क:पिं छँज:पिन्त नुग: ची फयेमा धका: बिचा: हायेकाच्चना।

**ज्यापु महागुथि**  
**किपू नगर समिति**

### बिचा: हायेका

जन्म:  
१९८२ ल्हुति पुन्हि  
सोमवा:



मदुगु: २०७२  
कार्तिक २३ गते  
त्रयोदशी सोमवा:

मदुम्ह पूर्णलाल महर्जन (भेला)

ज्वजलपा वा:पौया ग्वाहालिमि व शुभचिन्तकपिं भाजु रत्नबहादुर महर्जन व हिरालाल महर्जनया अबु पूर्णलाल महर्जन (भेला) ९१ दँय् आकाभाकां मदुगुलिं मदुम्हेसिया सुखावती भुवनय् बास लायेमा धका: मनंतुसें दु:खं:पिं सकल छँज:पिन्त नुग: चीफयेमा धका: बिचा: हायेकाच्चना

**ज्वजलपा वा:पौं**  
**निखासी, किपू-३**